

東
華
續
錄

東華續錄

同治一百

卷

臣王先謙敬編

臣張式恭恭校

秋七月辛丑朔享太廟○乙巳諭軍機大臣等沈葆楨等奏臺灣南北路防守情形請飭准軍迅速來臺一摺日本兵營屢聚龜山風港等處不時游弋各莊且有脅逼大鳥萬千仔帛二社到營說和及在茄鹿塘哨探情事沈葆楨見飭王開俊由東港進紮枋寮戴德祥由鳳山填紮東港潘霽與曾元福等馳赴鳳山招募土勇激勵鄉團益於海口要隘催建兵棚以備淮軍分紮臺北諸路以夏獻綸所部一營駐紮蘇澳擬就淡蘭添募土勇兩營以厚兵力並開通山路即可分移岐萊各處墾荒布置尙屬周妥卽著沈葆楨飭令派出各軍認真防守毋稍疏虞並令潘霽等將生番各

社設法招徠俾爲我用倭人雇墨西國船隻被傷二案並著沈葆楨文煜李鶴年王凱泰飭令夏獻綸速行辦結仍一面招撫岐萊各處生番剴切曉諭毋爲利誘省城各路海防文煜等務當嚴密布置見在濟安等輪船次第駛回臺灣南北防務略有端倪沈葆楨等惟當慎密防維固不可掉以輕心亦不宜冒昧從事總期審度機宜悉心籌畫以副委任唐定奎所帶徐州洋槍隊十三營見在曾否起程著李鴻章李宗義張樹聲飭令該提督迅速赴臺以資得力○丙午諭內閣李鴻章奏職官報效木植見在無從驗收轉解一摺據稱候選知府李光昭報效木植見與美法兩國商人互控結訟膠葛甚多其所買法商木植較之呈報內務府之數木價旣多浮開銀亦分毫未付等語李光昭所辦木植經李鴻章查明係買自法商其價僅議定洋銀五萬四千餘元而在內務府呈

稱購運洋木竟敢浮報值銀三十萬兩之多似此膽大妄爲欺罔朝廷不法已極李光昭著先行革職交李鴻章嚴行審究照例懲辦所有李光昭報效木植之案著卽註銷○諭軍機大臣等李鴻章奏李光昭報效木植見與洋人互控結訟並密陳李光昭性情狡譎語言荒唐各摺片李光昭與法美領事構訟各執一詞必須持平妥辦著李鴻章飭令該關道與各國領事官會審明確秉公辦理該革員以五萬餘元之木價捏報三十萬兩已屬荒唐且面求美領事代購價值法領事照會關道請拘畱李光昭毋使逃走無恥已極尤堪痛恨該督旣稱李光昭在外招搖出言不慎且恐有別項情節卽著李鴻章迅速確切根究按律嚴辦不得稍涉輕縱將此諭令知之○予浙江殉難知府李希郊建祠○戊申裁雲南琅鹽井提舉缺改爲石膏井提舉○己酉諭軍機大臣等劉長

佑奏見籌剿撫越南匪徒及越南近日情形一摺法人與越南會
剿各匪之議未可遽信則粵軍未可遽撤匪徒未可遽招劉長佑
所籌各情詳審周密實爲切中竅要見在法人原駐河內者漸次
退出其大小洋船亦皆退泊左金港口有俟涂普義來時仍欲進
紮省城及勒令南官往勸劉泳幅讓出河路之說用意殊屬叵測
粵軍駐紮高諒旣爲越南聲援又可自固疆圉見在黃崇英股匪
屢爲劉泳幅所敗復爲滇省開化練勇所截機會大有可乘劉長
佑已飭徐延旭趙沃體察越南賊勢軍情籌辦剿撫仍著該撫隨
時密授機宜以期於事有裨粵東官軍查辦積匪漸次蒧事卽可
進駐欽州遙爲犄角著瑞麟張兆棟會商劉長佑協力通籌俾兩
省邊防同臻鞏固總期安本境而綏藩服此中大有權衡該督撫
等必能籌畫盡善也徐延旭等到防後如何辦理情形著劉長佑

詳悉具奏將此由四百里各諭令知之○庚戌諭軍機大臣等榮全奏官兵兩次擊敗回逆臺路已通並請將孝順仍畱軍營各摺片逆回兩次撲犯西湖等處滋擾南臺雖經官軍擊退仍恐去而復來該處爲前敵餉道關繫甚重著榮全仍飭孝順等勤加偵探嚴密防範並與沙克都林扎布等聯絡聲勢前後夾擊毋稍大意察哈爾官兵到營後並著酌量分撥飭令速赴前敵以資助勦庫爾喀喇烏蘇地方既據奏稱遭亂後舊制一時難復新任領隊大臣孝順卽著准其暫畱榮全軍營專辦前敵軍務將此由五百里諭令知之○壬子諭軍機大臣等景廉馬隊官兵暫難分撥並請飭設法轉運接濟大軍一摺吉爾洪額等馬隊旣據景廉奏稱暫難抽撥卽著俟金順到古城後悉心商酌設法分撥勁旅前赴西湖助勦金順業已出關劉宏發步隊五營先赴坤城該軍口糧已

經景廉籌撥接濟惟後路大軍皆以轉輸不繼停畱於安玉等處見在事機正急各軍豈容阻滯中途著左宗棠懷遵疊次諭旨設法速爲轉運俾資飽騰毋稍缺乏本日已有旨授景廉爲欽差大臣金順爲幫辦大臣新疆事宜該大臣等責無旁貸金順見在行抵何處著迅速先行赴古與景廉籌商進兵機宜金順一抵古城卽著迅速奏聞以慰厯繫榮全兵力尙單逆回疊犯西湖等處並著該都統妥籌兼顧以期聯絡聲勢俾壯軍威刻下大軍陸續西行餉需不容稍緩著戶部速籌有著之款源源撥解毋令停兵待餉致誤事機將此由六百里各諭令知之○諭榮全見在塔城籌辦西路軍務屢經奏調景廉金順所部前往助剿古城防務喫緊景廉所部馬隊未能分撥金順又不能卽抵古城均屬緩不濟急不若就地籌畫兵力設法自強伊犁迤北數百里尙有察哈爾官

兵駐牧去塔城精河均不甚遠此項官兵定額一千八百餘名或全數調往西湖或酌調一半訓練成軍土爾扈特蒙古近駐庫爾喀喇烏蘇南山亦可酌調二三百名藉壯聲勢大河沿戶民約數百家如招募數百名入營隨同打仗可補兵力之不足其不願入營者飭令築堡自衛伊犁之南尙有錫伯營及厄魯特人眾均在本遊牧駐紮人數尙不單弱榮全本有整頓伊犁營制之責如能就近調募加意撫綏俾成勁旅較之遠道望援甚爲便捷卽著該署將軍酌度情形妥爲籌辦將此由六百里諭令知之○命左宗棠爲大學士仍畱陝甘總督任○授烏魯木齊都統景廉爲欽差大臣督辦新疆軍務正白旗漢軍都統金順幫辦軍務○追予烏魯木齊殉難提督平瑞事蹟宣付史館與故古城領隊大臣保恆署領隊大臣惠慶各建專祠各家屬等暨陣亡官兵一併附祀○

乙卯諭曾璧光妥籌黔省善後事宜○丙辰諭軍機大臣等沈葆楨等奏續陳防務暨撫番開路情形各摺片日本兵船仍在龜山等處相持日久尙未退兵見在羅大春黎兆棠均已到臺沈葆楨已飭張其光等開通山路潘霽亦前往鳳山督練新軍催集民團綏撫番社並飭地方官豫籌客兵薪米各省輪船陸續駛回唐定奎一軍不日亦可趕到刻下颶颶時作琅瑤難泊輪船龜山倭營又當風衝彼族正在進退維谷之際著沈葆楨文煜李鶴年王凱泰潘霽酌度情形審慎籌畫使倭船迅離臺境柳原前光在都經總理各國事務衙門王大臣與之剴切辯論該使臣語意枝梧沈葆楨等務宜乘此兵燹未開速爲布置一面撫馭番眾一面厚集兵力俾壯聲威倭人劉穆齋失銀一案並著飭令夏獻綸迅行辦結毋令藉故耽延○戊午諭內閣御史陳彝奏內務府大臣辦事

欺蒙請予處分一摺革員李光昭報效木植種種欺罔業經降旨交李鴻章審辦總管內務府大臣於該革員先後具呈時並不詳查駁詰遽爲陳奏實屬辦事欺蒙咎有應得均著交部議處以示懲儆尋吏部議總管內務府大臣崇綸明善春佑均應照溺職例革職從之○戊午撥巴里坤戰馬三百匹赴哈密軍營○己未諭內閣朕於八月二十七日啟鑾駐蹕南苑九月初六日還宮○飭山西巡撫甯夏滿營兵餉○庚申 上幸瀛臺○比利時國使臣謝惠施等三人於紫光閣前瞻覲○甲子 上幸瀛臺○御紫光閣閱吉林黑龍江弁兵馬步射○諭內閣御史孫鳳翔奏前署內務府司員肆行欺罔情罪尤重請先予嚴懲一摺據稱上年李光昭呈請報效木植及此次呈進木植皆係見任內務府大臣貴寶署理堂郎中任內之事貴寶蒙混具稟呈堂並與李光昭交通舞

弊等語貴寶於李光昭報效木植一案輒敢蒙混回堂入奏致李光昭得售其奸欺蒙尤甚貴寶著先行交部嚴加議處並著李鴻章查明李光昭有無與貴寶交通舞弊情事據實奏明辦理以示懲儆尋吏部議貴寶應照溺職革職例革職從之○乙丑諭軍機大臣等奕榕奕艾奏甯古塔城被匪闖入旋經收復見在搜剿餘匪一摺甯古塔地方突有馬步賊匪三百餘名分股撲城署副都統雙壽未能抵禦被匪闖入城內見在雖經烏勒興阿等將賊擊退收復城池惟賊眾分股竄逃難免不散而復合刻下各處馬賊未盡剿除儻再勾結蔓延爲害實非淺鮮著奕榕等咨令烏勒興阿雙壽督飭兵勇協同派出官兵實力搜捕務將此股竄匪悉數殲除毋令乘閒遠颺復圖嘯聚甯古塔地方緊要該處官兵當如何嚴密防守以免疏虞乃賊匪僅有三百餘名該城卽行失守是

平時武備廢弛已可概見署副都統協領雙壽著摘去頂帶俟回協領任後仍帶革職畱任處分並著奕榕等責令迅將餘匪盡行殲滅以觀後效如再不知愧奮卽著嚴參懲辦將此由五百里各諭令知之○己巳諭內閣前降旨諭令總管內務府大臣將圓明園工程擇要興修原以備兩宮 皇太后燕憩用資頤養而遂孝思本年開工後朕曾親往閱看數次見工程浩大非剋期所能蒞功見在物力艱難經費支絀軍務未盡平定各省時有倭災朕仰體 慈懷甚不欲以土木之工重勞民力所有圓明園一切工程均著卽行停止俟將來邊境又安庫款充裕再行興修因念三海近在宮掖殿宇完固量加修理工作不至過繁著該管大臣查勘三海地方酌度情形將如何修葺之處奏請辦理將此通諭中外知之○庚午欽奉 硃諭傳諭在廷諸王大臣等朕自去歲正月

二十六日親政以來每逢召對恭親王時語言之閒諸多失儀著革去親王世襲罔替降爲郡王仍在軍機大臣上行走併載激革去貝勒郡王銜以示微懲○諭軍機大臣等景廉奏逆撲犯濟木薩官軍會剿獲勝一摺逆回白彥虎於本年六月間糾黨撲犯濟木薩經景廉飭令孔才並添派隊伍在三臺等處會剿獲勝疊有斬擒該匪雖經西竄難保不復圖回撲仍著景廉督飭孔才勤加偵探嚴密設防毋得稍涉大意金順見在行抵何處該都統務常督率所部迅赴古城與景廉會商剿辦以期迅掃逆氛將此由六百里各諭令知之○予濟木薩陣亡協領常明祭葬世職

八月辛未朔諭內閣朕奉 慈安端裕康慶皇太后 慈禧端佑康頤皇太后懿旨皇帝昨經降旨將恭親王革去親王世襲罔替降爲郡王並載激革去貝勒郡王銜在恭親王於召對時言語失

儀原端咎有應得惟念該親王自輔政以來不無勞勩足錄著加恩賞還親王世襲罔替載激貝勒郡王銜一併賞還該親王當仰體朝廷訓誡之意嗣後益加勤慎宏濟艱難用副委任○諭前降旨令總管內務府大臣將圓明園工程擇要興修嗣朕以經費支絀深恐有累民生已特降諭旨將圓明園一切工程卽行停止並令該管大臣查勘三海地方量加修理爲朕恭奉兩宮 皇太后駐蹕之所見在時值艱難何忍重勞民力所有三海工程該管大臣務當覈實勘估力杜浮冒以昭撙節而恤民艱○申諭吳棠查拏四川會匪並嚴禁胥役苛擾積弊○壬申諭軍機大臣等沈葆楨等奏臺灣近日情形力籌防務並北路倭案辦結市面槍傷生番見飭嚴辦及閩廠輪船懇准續造各摺片日本兵船在後灣楓港一帶日以益兵房掘濠溝豎竹圍爲事意圖招誘番眾恫喝村

民日久相持情形漸怯見在淮軍業經到臺羅大春已抵蘇澳夏
獻綸招募楚勇亦已成軍澎湖地方見借海關凌風輪船駐彼教
習閩廠六船隨同操練防務漸臻嚴密彼族自無隙可乘惟中路
水沙連秀姑巒一帶爲全臺適中之區地方最爲緊要刻下該處
社贊竟有教堂數處並有逃匪通匿其間沈葆楨等見擬募兵前
往卽著與文煜李鶴年王凱泰潘蔚迅速籌商妥爲調派一面撫
綏番眾搜捕匪徒一面開路設防力求固守安平礮臺並著沈葆
楨等設法興築臺城倒塌千有餘丈見經發款分修著卽飭令周
懋琦等認真經理務期修築鞏固不准草率從事電綫雖可緩圖
鐵甲船必不可少卽使議購有成將來仍應鳩工自造目前尤須
講求駕駛之法沈葆楨等惟當切實籌辦力圖自強閩廠輪船卽
照所請准其續行興造得力兵船以資利用北路倭案已經辦結

沈葆楨等請將稅務司好博遜酌給獎勵之處著該衙門議奏屯番槍傷生番亟宜速爲查辦張其光正在下淡水一帶辦理招撫事宜何以聞信不卽行馳往拏辦迨回郡城後復不與沈葆楨言及實屬不知緩急此案關繫撫番全局豈容置若罔聞著沈葆楨等嚴飭張其光將屯番拏獲懲辦以安人心儻該總兵再行辦理顛預卽著沈葆楨等據實奏明從嚴參處○癸酉諭軍機大臣等都興阿奏竄匪勾結滋擾派兵迎剿情形一摺孤山敗匪由新兵堡竄出後復敢勾結匪徒回竄意圖窺伺邊內經官軍迎剿斃賊多名該匪旋向古城子等處北竄見經都興阿派令營總觀海等帶兵防剿卽著嚴飭各該員弁實力剿辦務將此股賊匪悉數殲除其鐵嶺開原等處並飭派防各員隨時探防遇賊卽擊毋任竄入邊疆志和等亦當督飭地方官認真緝捕以靖閭閻將此各諭

令知之○調寶璠爲兵部尙書英桂爲吏部尙書○都察院左都

御史英元卒予祭葬諡恭毅○以廣壽爲左都御史

由刑部右侍郎遷

甲戌調載崇爲刑部右侍郎崇綺爲吏部右侍郎以慶陞爲戶部

右侍郎

由內閣學士遷

○諭瑞聯整頓熱河捕務○戊寅祭大社大

稷○己卯吏部以大學士左宗棠應授何殿閣請得旨左宗棠著

授爲東閣大學士○壬午諭軍機大臣等前據李鴻章奏李光昭

報效木植見與洋人互控結訟並陳李光昭性情狡謫言語荒唐

當降旨將李光昭革職交李鴻章嚴行懲辦時逾一月有餘尙未

據該督覆奏著李鴻章將此案迅速嚴訊卽行奏結毋再遷延將

此諭令知之○申諭都興阿嚴緝奉天馬賊○癸未秋分夕月

於西郊○諭軍機大臣等都興阿奏股匪沿邊竄擾官兵勦辦情

形一招孤山敗匪糾黨回竄邊內經色楞額等督隊迎擊在中江

道李家臺等處斃匪多名餘匪竄至大網子溝地方越山逃遁著
都興阿嚴飭派出員弁實力緝拏其沿邊一帶並著飭令帶隊各
將領嚴密防守毋任匪蹤紛竄將此由四百里諭令知之○戊子
諭內閣前因已革知府李光昭報效木植浮開價銀並在外招搖
各節當諭令李鴻章嚴訊究辦茲據李鴻章奏訊出李光昭捏報
木價並捏造奉旨採辦銜條旗號及圓明園監督各情實屬膽大
妄爲不法已極李光昭卽著照所擬斬監候秋後處決另片奏李
光昭訊無與貴寶交通舞弊實據惟內務府筆帖式成麟擅自出
京偕李光昭潛往各省請旨革職等語成麟著卽行革職以示懲
儆貴寶業經革職著毋庸議○調黑龍江馬隊官兵五百名助剿
吉林馬賊○己丑以興京城守尉一缺責任繁重命加副都統銜
著爲例○撥河南司庫銀九萬兩備黃河工需○庚寅諭各直省

整頓捕務○乙未諭內閣見在大軍陸續出關著派欽差大臣大學士陝甘總督左宗棠督辦糧餉轉運一切事宜內閣學士袁保恆著作爲幫辦並將西征糧臺移設肅州著袁保恆前往該州駐紮○詔各直省督撫酌裁釐局禁種罌粟○丁酉 上幸南苑○諭軍機大臣等李瀚章等奏湖北應協雲貴餉項請由督撫派員催解等語據稱湖北奉撥月協滇軍餉銀二萬兩嗣經改爲提督馬如龍專餉疊次皆由該提督派員守催見在馬如龍路經湖北隨帶弁丁七八十人之多坐索欠餉甚急由李瀚章等籌解銀二萬兩仍復藉端挾制迨經劉嶽昭過鄂與之婉商再籌解銀四萬兩始允清款又近來雲貴兩省每將尋常商戶欠項以及文武廉俸等款不由督撫知照徑由藩司填給庫收令其至鄂由協餉匯兌各情各省協濟餉需自應由督撫派員催領且目前各省庫款

支絀籌措爲難若如該督等所奏帶兵官帶領多人坐索欠餉且零碎款項悉由鄰省支給實屬不成事體嗣後湖北應協雲貴兩省餉項卽著劉嶽昭岑毓英曾璧光派委妥員前往催解不得令帶兵官自行委員催取並不得以尋常欠款指餉匯兌以免分歧而重餉需將此由五百里各諭令知之○戊戌閱御前王大臣乾清門侍衛等騎射○己亥 上行圍

九月庚子朔 上幸晾鷹臺撒圍○賞南苑官員段匹暨苑戶等一月錢糧並賞海戶銀○辛丑 上幸晾鷹臺閱神機營兵○壬寅閱御前王大臣乾清門侍衛等射○諭軍機大臣等景廉奏檄飭防軍截擊竄匪一摺沙山馬橋等處時有賊匪竄擾防務甚關緊要西湖地方亦恐有賊匪回竄景廉已飭沙克都林扎布在沙山馬橋等處防守與西湖各營互爲聲援仍著隨時偵探如有賊

匪撲犯西湖卽行帶隊截擊毋令深入見在額爾慶額馬隊並金順所部步隊五營已抵古城金順亦由安西拔隊西進兵力較厚金順到營後著景廉悉心會商酌撥數營前往西湖一帶援剿以遏賊氛將此由五百里各諭令知之○賞內閣學士松淮副都統銜爲駐藏大臣○子哈密被戕副將李萬勝祭葬世職○癸卯予管神機營事醇親王等加級有差並賞兵丁銀○賞南苑圍場章京等段匹銀兩○甲辰予管奉宸苑事御前大臣景壽等加級有差○乙巳 上還宮○諭內閣榮全所進黑花馬一匹朕乘騎甚穩著賞給鐵龍駒名號榮全著加恩賞給大卷江紬二卷小刀一把大荷包一對小荷包一對○丙午諭整頓京營捕務○丁未諭內閣大學士兩廣總督瑞麟老成端恪練達勤能歷受 先朝知遇之隆洊升卿貳入贊樞機咸豐三年 特命赴直隸天津等處

督兵勦匪克奏膚功朕御極後簡授廣州將軍調任兩廣總督在
粵十年練兵訓士綏靖邊疆辦理地方事宜均臻妥協旋晉綸扉
仍畱總督之任敷歷中外懋著勤勞前因患病賞假調理方冀漸
次就痊長承恩眷茲聞溢逝悼惜殊深著加恩追贈太保照大學
士例賜卹入祀賢良祠任內一切處分悉予開復應得卹典該衙
門察例具奏准其入城治喪其靈柩回旗時著沿途地方官妥爲
照料伊子候選知府懷塔布著俟服闋後以四品京堂候補主事
佛呢音布著賞給員外郎花沙布哈芬布均著俟百日孝滿後由
該旗帶領引見用示朕篤念耆臣至意尋予祭葬諡文莊○以英
翰爲兩廣總督未到任前以廣東巡撫張兆棟兼署調吳元炳爲
安徽巡撫以翁同爵爲湖北巡撫前陝西巡撫未到任前以湖廣總督
李瀚章兼署○戊申以鐵祺爲內閣學士由詹事選○己酉諭軍機大

臣等桂清奏興京地方緊要請添設大員鎮守一摺奉天馬賊日多屢經剿辦未能淨絕根株且時有擾及興京之事近復有邊外賊匪聚集七八百人窺伺邊內新兵堡地方商賈居民紛紛遷徙該處地方緊要亟應嚴密防範以淨賊蹤興京僅有城守尉一員前經都興阿等奏請加副都統銜俾資鎮攝業經允准見在桂清請於該處添設副都統一員一切體制章程官兵員數均仿照金州錦州之例自爲陵寢重地格外加慎起見惟添設大員應籌經費應否將盛京副都統移紮興京其員缺卽照京旗以待郎兼任以及陵寢官兵應否照馬蘭泰甯兩鎮章程責成管轄著都與阿志和麟書繼格銘安桂清恭鏗悉心履勘繪圖貼說詳細妥議具奏至添設副都統後城守尉自毋庸加副都統銜或卽將此缺裁撤並著一併議奏桂清原摺著鈔給都興阿等閱看將此各

諭令知之○庚戌調吳元炳爲江蘇巡撫未到任前以兩江總督

李宗義兼署以裕祿爲安徽巡撫紹誠爲安徽布政使調興奎爲

河南按察使

由浙江調

○乙卯詔江西湖南湖北自明年始悉運本色

漕糧毋得奏請折徵○予甘肅陣亡參將吳國泰祭葬世職○丙

辰諭軍機大臣等奕榕等奏殲除匪首塔界漸就肅清見在剿辦

姓屬金匪一摺竄擾塔城匪首王冥誅卽王汶拴業經擒獲正法

餘匪亦經副都統烏勒興阿搜剿殆盡遠近山場溝內一律肅清

惟敗殘餘匪尙在遁逃仍須乘勢搜捕以期淨絕根株見在三姓

所屬山場尙有金匪聚集亟應乘此聲威迅行剿辦奕榕等已添

調官兵助剿卽著奕榕奕艾咨令副都統勝安親督官兵入山搜

剿務將伏匿金匪趕緊剿洗淨盡不准一名漏網並著咨令烏勒

興阿暫緩撤兵仍在塔界擇要堵擊以防金匪分竄此次拏獲匪

首及在塔境出力各員准由奕榕等歸案擇尤保獎毋許冒濫塔城被擾失去之左右兩司關防佐領等圖記均著該部按照單開照例補行頒發將此各諭令知之○戊午諭內閣軍機大臣刑部奏官犯成祿呈遞呈詞請派大臣覆訊一摺已革烏魯木齊提督成祿誣斃多命一案前經軍機大臣會同刑部審訊比例擬以斬立決並以成祿究係誤聽人言與實在誣民爲逆者不同應否改爲斬監候聲明請旨復經御前大臣大學士六部九卿會議仍照原擬具奏當經降旨改爲斬監候已屬法外施仁豈容該犯任意狡辯成祿仍照原擬斬監候該犯所遞呈詞等件著毋庸置議○諭軍機大臣等沈葆楨等奏准粵兩軍到臺及南北開路情形一摺見在淮粵兩軍陸續到臺卽著分別布置擇要扼紮以壯聲威臺南生番尙易招致北路各社率多頑梗之徒大南澳平埔等處

有兇番糾集丁壯數千意在抗違沈葆楨等務當悉心籌度恩威並用會同羅大春加意招徠妥慎辦理不可輕易進紮致爲番族所乘轉礙撫番大局臺郡城垣關繫緊要著督飭該地方官速行修葺務期鞏固沈葆楨另片奏大雅安瀾輪船遭風損壞自請議處等語此次損壞船隻卽著分別設法修理沈葆楨未能先事豫防殊屬疏忽著交部議處製造輪船工鉅費繁嗣後務當飭令該管駕等隨時加慎又片奏訊結屯番槍傷生番一案卽著照所議辦理○予故提督吳雲集附祀曾國藩祠○己未飭各省迅解京師欠餉○庚申諭戶部籌撥西征餉銀諭楊昌濬等迅解滇省欠餉○癸亥戶部左侍郎宋晉卒予祭葬○以袁保恆爲戶部左侍郎由內閣學士遷○轉成林爲理藩院左侍郎以蘇勒布爲理藩院右侍郎由左副都御史遷○乙丑諭內閣予告大學士賈楨持躬端謹學問優

長受 先朝知遇之隆由翰林入直上書房游陟正卿入贊綸扉
疊司文柄朕御極後派充 實錄館監修總裁優加簡畀倚任方
殷旋以患病屢請開缺准予致仕賞食全俸方冀頤養安和長承
恩眷茲聞溢逝悼惜殊深著賞給陀羅經被派載濂帶領侍衛十
員卽日前往奠醊加恩晉贈太保照大學士例賜卹入祀賢良祠
任內一切處分悉予開復應得卹典該衙門察例具奏靈柩回籍
時並著沿途地方官妥爲照料伊子道員用河南彰德府知府賈
致恩著俟服闋後以道員遇缺卽選伊孫員外郎銜主事賈孝珍
著以郎中分部卽補用示朕篤念耆臣至意尋予祭葬諡文端○
丙寅總理各國事務衙門奏切籌海防將緊要應辦事宜撮敘四
條請飭詳議命各督撫詳細籌議將逐條切實辦法限於一月內
覆奏○丁卯諭錢鼎銘添撥東河搶餉銀二萬五千兩○戊辰予

故署安徽巡撫李孟羣附祀湖北按察使李卿穀祠○已巳諭軍機大臣等李宗義恩錫奏憑陳近日黃水情形請派廷臣會議一摺江南揚莊以下舊黃河業經李宗義派員挑濬並酌做裏頭以備溜至堵閉惟近來黃水愈益南趨李宗義以東省決口不堵不特江省無從措手卽東省曹濟各屬齊河利津一帶亦岌岌不可終日萬一蘭儀等處再有失事直隸安徽均恐受害是目前情形較前數年更形喫緊亟宜豫行籌策以期一勞永逸應如何妥籌辦理之處著李鴻章李宗義文彬喬松年錢鼎銘恩錫悉心籌畫會議聯銜具奏請旨辦理李宗義等原摺著鈔給李鴻章等閱看將此由四百里諭知李鴻章李宗義文彬喬松年錢鼎銘並傳諭恩錫知之○以達克丹爲理藩院額外侍郎

烏珠穆沁貝勒

○是月減免

兩浙橫浦等六場被水上年竈課有差

冬十月庚午朔享 太廟○辛未諭內閣本年十月初十日恭遇

慈禧端佑康頤皇太后四旬萬壽慶洽敷天因思京外實任文武一二品大員老親有年屆八十以上者康彊逢吉祿養承恩洵爲盛世嘉祥允宜特加賞賚著吏部兵部八旗都統卽行查明分別咨報軍機處開單呈覽候旨施恩○諭已革提督劉銘傳著加恩開復原官○甲戌賜張鳳鳴等一百三十五人武進士及第出身有差○丙子 上率近支親藩恭迎 慈禧端佑康頤皇太后御慈寧宮陞座侍宴 上捧觴上 壽綵衣躬舞王貝勒貝子公等以次進舞禮成奉 慈安端裕康慶皇太后 慈禧端佑康頤皇太后幸漱芳齋侍膳賜近支親藩等食○丁丑 上奉 慈安端裕康慶皇太后 慈禧端佑康頤皇太后幸寧壽宮侍膳賜近支親藩等食○戊寅 上奉 慈安端裕康慶皇太后 慈禧端

佑康頤皇太后幸寧壽宮侍膳賜王以下文武大臣暨蒙古王貝勒等食至庚辰皆如之○己卯 慈禧端佑康頤皇太后四旬聖壽節 御慈寧宮 上率王以下文武大臣暨蒙古外藩等行慶賀禮○賞隨班祝嘏廢員前馬蘭鎮總兵官慶錫等職銜○免王公文武官員降罰畱革處分○命廣科以都統遇缺題奏晉照祥御前侍衛桂祥佛佑乾清門侍衛○庚辰以廣東沿海猝遭颶風諭張兆棟等撫恤災民○壬午賞五城貧民棉衣銀○甲申左宗棠奏 臣前奏出關諸軍餉數及糧價運腳應由戶兵兩部會議一摺聲明除額爾慶額所統馬隊金順所統馮桂增一營糧餉腳價由 臣與穆圖善餉項內劃給毋庸另籌外其金順張曜宋慶等出關各軍餉糧應否酌中定議俾諸軍餉饋有著嗣准部覆金順張曜宋慶應各將該軍所需正餉糧科等項查照例章並體察關

外情形每月實需銀若干並原撥餉項分晰咨報由

臣奏明再由

臣覈辦等因已經奏明奉旨依議欽此

臣

比恭錄並鈔部文飛咨

金順張曜宋慶欽遵辦理頃接張曜咨報所部嵩武軍馬步十四營按人馬實數每月應支淨糧料四十三萬六千九百五十斤其管駝驛差弁夫長應支食之銀糧駝驛應支食之料尙不在內該軍由河南應餉計每月照章應得正雜餉銀三萬七千二百八十餘兩若將糧料價值轉運各費攤扣不但全軍無餉且欠數甚鉅應請奏准將該軍糧運經費作正開銷俾各營仍得正雜餉款以資食用津貼其自出關以後軍裝軍火軍餉等項轉運應請再添撥銀五千兩以清墊款此張曜所報軍餉數目也宋慶所部毅軍據報步隊十四營又一旗馬隊一營又一起統計步勇七千二百名長夫一千五百餘名馬勇四百名長夫百三十六名共計馬步

勇夫九千一百三十六名隨員差弁夫丁不計月需淨糧料四十九萬三千一百餘斤照河南餉章大建每月支銀四萬二千餘兩小建月支銀四萬一千餘兩前因出關各軍採糧轉運艱阻萬狀奏明暫由肅州移駐涼州甯夏就近採運糧料供軍價平腳省尙可毋庸議加惟見擬撥馬步勇丁千名馬百餘匹先進哈密放水灌池爲續進開墾之計及將來各營出關所需糧運屆時再照張曜餉事議增乃昭平允至宋慶所稱前因料理出關挪用正餉購辦駱駝千隻見已到營雇駝夫三百名此項駝料夫糧每月需銀四千兩應請按月添撥此宋慶所報軍餉數目也金順一軍合明春所部自定馬步二十營人數在一萬以外嗣奉諭旨明春所部歸其自帶聞金順仍自定馬步二十營所需糧料計已由局發過一千二百萬斤除派提督劉宏發等六營赴古城外金順擬於九

月內親帶馬步四營赴巴里坤餘仍屯駐肅州安西該軍馬步餉章與楚軍相仿較之張宋豫軍餉章爲優其在安肅糧料均由肅局應付應請作正開銷該軍餉項提解不少頃據額爾慶額桂錫楨等古城來報該處一帶糧料每石重三百餘斤合銀三兩近因官軍陸續到境景廉定作四兩三錢已爲金順訂買二萬餘石旋據史念祖等稟報所聞相同似金順全軍撥行可供十箇月之食但臣所接景廉八月來緘尙云須由關內齎糧前往金順近日來牘亦以爲言無從揣測按關內採糧由涼州起歷甘州肅州以達安西計程一千五百六十里合糧料價值車馱駝隻運腳及各項費用計算每糧料百斤實需銀十一兩七錢有奇惟由涼州而西抵肅州所採糧料近西一站則連腳之費可遞省一站故甘屬運腳省於涼肅屬運腳又省於甘也是糧運價值雖由涼起算而程

途遠近卽價腳多寡所關並非以十一兩七錢上下爲定也原奏亦曾聲敘及之景廉前奏稱科布多烏里雅蘇台採糧一石運至古城需銀十餘兩勞費甚多已奏停止而以出關各軍糧料應由關內接濟爲言不知由烏科採運至巴古需銀十餘兩之多僅與由涼採運至安西所費價腳相等而由烏科採運至古地一石計重三百餘斤較由涼州運安西計重百斤之價腳已少三分之二況由安西逾哈密轉運巴古計二十六站一千九百八十七里每百斤又須加運腳過倍乎臣前緘致金順言之頗詳然猶不知巴古一帶本有糧可採價並不昂又可省運費二十餘倍也以臣所見所聞言之金順到巴古後萬無舍近求遠舍易圖難舍賤食貴之理臣與景廉金順同辦一事所用同係朝廷至艱之餉但論於軍情國計有裨何庸妄存意見所有金順一軍餉事糧事就所知

者據實陳之至查照例章體察關外情形每月實需若干應請飭金順自行陳明聽部臣覈辦金順既蒙簡放幫辦大臣本軍事體應自徑陳臣尤不應越瀆也所有諸軍餉數及糧運價腳謹據實覆奏伏乞 皇上聖鑒訓示施行 上諭軍機大臣等出關各軍餉項業經張曜宋慶報明數目張曜一軍糧運經費所請作正開銷該軍出關後轉運軍火等項卽著左宗棠酌度情形妥爲辦理金順擬於九月內親帶馬步四營赴巴里坤餘仍屯駐肅州安西該軍糧料由左宗棠發過一千二百萬斤見在古城糧料價值每石三百餘斤由景廉定作四兩三錢已爲金順訂買二萬餘石是金順全軍足供數月之食而關內齎糧前往計程愈遠運費愈繁左宗棠所陳糧運勞費自屬實在情形巴古一帶既有糧石可採價值不至過昂可省運費二十餘倍之多自不必由關內採運以

省浮費卽著左宗棠景廉金順妥爲籌商總期軍食有裨不可舍
易圖難更不得意存推諉至金順一軍每月實需若干卽由該幫
辦大臣覈實奏明辦理張曜一軍每月駝乾銀五千兩向由晉省
撥發刻下軍行較遠提解爲難著鮑源深卽將此項銀兩按月解
至西征糧臺以便轉解應用該軍皮衣銀兩卽著左宗棠撥款賞
給將此由五百里各諭令知之○左宗棠奏部議出關各軍運腳
照定例按程覈算較臣原奏每糧百斤約需銀十一兩七錢上下
數目不無懸殊查例載運腳係專指輿用車騾駝價而言臣原奏
關內採運由涼州歷甘州肅州以達安西計程一千五百六十里
每糧百斤約需銀十一兩七錢上下係合糧價車騾駝隻腳價及
員弁人夫薪糧牲畜草料口袋什物局費一切統算在內均勻攤
價故與例載專指腳價言者多寡之數不符若專就運腳言之固

不至懸殊也且此時甘省新復之區人物彫殘絲毫不能藉資民
力與從前承平日久地方完善情形判若霄壤自未可按照成例
致誤轉輸見時關內轉解糧餉軍裝軍火官運民運相輔而行民
運腳價無論雇用車騾駝馬酌定每運百斤百里均各給銀四錢
而額爾慶額出關雇用之民駝則自定百斤百里給腳銀五錢關
外食物昂於內地腳價較內地加增見辦情形已難一律也民運
腳價之外尙有民夫口食牲畜餵養及應用什物各項一有缺乏
立形滯礙停待一日所費更多故必須設立官局隨時給領酌扣
價銀始爲省便雖比民間買價津貼已多而費實不容惜故關內
民運百斤百里給腳價銀四錢合之局用津貼實不止四錢關外
民運百斤百里給腳價銀五錢合之局用津貼亦尙不止五錢也
官運須分途採購車馱分幫派弁夫管理車軸鞍架繩索口袋什

物須隨時修整備辦牲畜須按站豫備草料醫藥以資餵養車輛損壞牲畜倒斃又須裁併挑換隨時買補填槽所費極繁而總分局員弁夫役護勇工匠薪糧局用正雜諸費尙未計也此項費用指官民運腳而言自應攤入糧價並算約言之則爲一端分言之則款目瑣碎非俟轉運歲役專案據實開報請銷急難清理就緒此時就臣所墊過糧價實銀言之除宋慶一軍去歲由甘州肅州各局支領糧料已經結算價銀外金順一軍領過糧料截至本年九月內共一千二百萬斤應攤合價銀六十六萬餘兩內收還銀六萬七千五百七十六兩一錢八分尙墊過銀五十九萬餘兩張曜一軍領過糧料截至本年九月上旬止共支四百七十萬零九百餘斤應攤合價銀二十五萬九千餘兩內收還銀六千餘兩尙墊過銀二十五萬三千餘兩合之金順一軍糧價由臣墊付者已

八十餘萬兩此該兩軍未出關以前由甘肅州各局就近支領居多故攤扣價銀每百斤約合五兩五錢有奇若全隊出關以後糧運仍由內地籌供則由涼州遞運安西州每糧百斤實需銀十一兩七錢有奇安西轉解哈密又須從新起算程途遠近卽價腳多寡所分路途少一站運費可省一站牽算分攤費自輕減並非以由涼州至安西州十一兩七錢上下爲定也前摺已經陳奏所有運腳難拘定例及臣墊過金張兩軍糧價截止本年九月上旬實數謹附片陳奏再金順一軍借過臣軍餉銀十二萬兩並未還款見又允借駝隻三四百隻運糧至巴里坤張曜一軍借過臣軍餉銀三萬兩未還見又借助駝隻運糧至哈密均未在兩軍採運欠項內計算合併聲明伏乞 聖鑒訓示得旨戶部知道○乙酉諭內閣巡視北城給事中春慶等奏拏獲多年在逃逆犯請交部

審辦一摺已革署參將張兆綬係因通匪奉旨正法之員膽敢逃匿提督馬如龍門下改名張瑞臣潛行來京實屬不法已極經北城拏獲供認不諱著卽交刑部嚴行審訊按律懲辦湖南提督馬如龍著先行解任聽候傳質○丙戌諭軍機大臣等禮部奏朝鮮國貢使被劫據咨轉奏一摺朝鮮國貢使回國行至鳳凰城邊門以外竟有匪類結夥持械搶奪行裝實屬不成事體亟應嚴密查拏著都興阿志和恭鏜派委員弁前赴邊門以外迅卽緝拏懲辦毋任遠颺嗣後朝鮮貢使過境應如何防護並邊外如何設法整頓毋使奸徒滋蔓之處並著都興阿等體察情形悉心妥議奏明辦理以清貢路而靖邊圉將此諭知禮部並由四百里各諭令知之○莊親王奕仁薨予祭葬諡曰厚○丁亥以歧元爲內閣學士

由太常寺卿遷

○飭山東等省迅解奉天協餉○賞通州王恕園等處賑

米六百石○戊子諭軍機大臣等本日李鶴年奏參藩司不能稱職一摺據稱福建布政使潘爵由捐納佐雜出身心術陰柔人品卑瑣差委員缺多係捐班人員以致物議沸騰編造歌謠黏貼街市且有袒護同鄉結爲朋黨及與將軍拜認師生各情近日辦理日本事宜卑詞下氣求悅夷人大失國體等語該藩司見在臺灣其辦理一切事宜以及平日居官行事沈葆楨知之必稔卽著按照李鶴年所參各節秉公詳細查明迅速據實具奏毋稍徇隱原摺著鈔給閱看○李瀚章奏湖北漕糧驟難徵本色請採買米三萬石運津允之○己丑定新設甘肅固原直隸州知州爲衝繁難要缺海城縣知縣爲繁疲難要缺平遠縣知縣爲繁難中缺回原州州判海城縣縣丞均爲要缺平遠海城二縣訓導典史同心城巡檢均爲簡缺○庚寅諭軍機大臣等戶部奏出關各軍餉項暨

新疆各城軍餉請歸西征糧臺經理一摺見在大軍出關相機進
取前經降旨派左宗棠督辦糧臺轉運一切事宜並令袁保恆幫
辦所有出關各軍應需糧餉運費等項自應統歸左宗棠袁保恆
斟酌緩急奏請籌撥至新疆軍餉近年各城請撥頭緒紛繁殊不
足以昭覈實亦應由左宗棠等一併經理嗣後出關各軍暨新疆
各城請撥餉需均由該統兵各員及各城大臣咨照左宗棠袁保
恆覈明數目酌量奏撥不得紛紛自行奏請以歸畫一而專責成
卽著左宗棠景廉金順袁保恆咨照該統兵各員及各城大臣一
體遵照辦理左宗棠袁保恆務當通盤規畫酌盈劑虛覈實籌撥
毋任稍有匱乏原摺均著鈔給閱看將此由五百里各諭令知之
○壬辰諭軍機大臣等沈葆楨等奏臺灣近日情形並淮軍到臺
一摺日本兵船尙未退出臺灣刻下退兵章程業經定議惟此後

海防各事宜亟須認真講求以期有備無患見在淮軍三起均抵澎湖應如何分紮要隘之處仍著沈葆楨等酌度情形妥爲布置其南北開路以及郡城修築礮壘各事並著該大臣等悉心經理毋稍鬆勁刺桐腳莊民已與龜紋社釋嫌尋好琅瑤諸社均受約束其餘亟須次第清查惟入山愈深番社愈雜北路復有生番撲犯礮樓傷斃兵丁之事亟應妥爲籌辦俾番眾悉爲我用藉可自固藩籬著沈葆楨文煜李鶴年王凱泰潘鵬飭令派出各員設法招徠隨時撫恤招墾事宜仍須商同羅大春認真籌畫臺郡城工業已過半安平礮臺見擬設於三鯤身地方一切工程沈葆楨等務當悉心經畫毋得畏難思阻○允鮑源深奏畱丁憂提督張樹屏辦理冬防○賞八旗步軍綠營兵丁一月錢糧○癸巳命左都御史廣壽侍郎夏同善赴陝西查辦事件○予雲南殉難同知鄭

自燿等建祠○丁酉諭軍機大臣等大學士文祥奏敬陳管見一摺臺灣之事權宜辦結亟宜未雨綢繆豈可仍蹈因循錮習著沈葆楨文煜李鶴年王凱泰潘蔚悉心籌商所有在臺兵勇應如何酌畱准軍案稱得力見在業已到臺應如何分紮防堵全臺事宜應如何布置該大臣等務當妥爲經畫以善將來並著李鴻章李宗羲將前議購買未成之鐵甲船水礮臺及應用軍械等件迅速籌款購辦庶幾兵械精良有備無患原摺著鈔給閱看○己亥

上不豫仍治事如常命軍機大臣李鴻藻恭代批答章奏○諭軍機大臣等都興阿等奏勦辦金州逸犯情形一摺逸犯高希田潛回夾心子地方經營總奎山等帶隊往捕該犯膽敢勾結匪黨聚眾抗拒我兵奮勇衝擊斃匪多名高希田向北逃竄其餘匪黨竄由貔口街市歸併高希田圍寨亟應迅速捕拏以靖地方著都興

阿等飭令派出隊伍馳赴金州貔口會合各軍協力兜擒相機辦理總期淨絕根株毋任蔓延爲患其沿海各口岸並著都興阿等嚴密防範以杜竄越將此由四百里各諭令知之○是月蠲緩直隸定州等四十五州縣被水被旱被雹本年額賦租課暨民借倉穀開州等三州縣被水本年額賦並減免差徭

十一月庚子朔改甯國營爲皖南鎮標左營以原設參將與蕪采營遊擊對調添設皖南鎮標右營都司守備各一改設荻港外委一撥遊兵營荻港千總一銅陵采石汛把總二歸皖南鎮標右營轄○甲辰惇親王等議奏 聖躬正宜調攝每日批摺仍遵前旨暫由李鴻藻敬繕批答清字摺件並暫由奕訢等敬繕從之○賞察哈爾移回塔城官兵三月俸餉○己酉諭內閣朕於本月遇有天花之喜經惇親王等合詞籲懇靜心調攝朕思萬幾至重何敢

稍耽安逸惟朕躬見在尙難耐勞自應俯從所請但恐諸事無所
稟承深虞曠誤再三籲懇兩宮 皇太后俯念朕躬正資調養所
有內外各衙門陳奏事件呈請 披覽裁定仰荷 慈懷曲體俯

允權宜辦理朕心實深感幸將此通諭中外知之○命寶鋆爲大

學士

由兵部
尙書遷

○以惠林爲左副都御史

由大理
寺卿遷

○庚戌諭軍機大

臣等景廉奏籌畫邊疆軍務機宜請由甘肅遷移戶民分居奇古
等處各摺片回逆分踞烏屬各城相爲犄角逆餒甚張景廉擬分
路進兵會同金順由古城直取古牧地爲一路張曜由天山南直
取吐魯番爲一路並添派大員赴沙山會合沙克都林扎布錫綸
等直取瑪納斯爲一路卽著景廉金順隨時籌畫激勵將士安速
進勦力埽賊氛毋得稍事延緩關外糧餉轉運事宜前已有旨派
左宗棠督辦並令袁保恆幫辦移紮肅州疊據左宗棠袁保恆奏

請撥餉銀並籌糧運各事左宗棠袁保恆景廉金順同辦一事卽著隨事會商妥籌辦理景廉所請飭令戶部撥給庫銀六十萬兩並嚴催各省欠餉等語著戶部議奏景廉派員赴烏里雅蘇台等處採辦駝隻著理藩院知照管轄內外盟蒙古將軍大臣傳知蒙古王公轉飭各愛曼隨時出售按市價官爲採買毋許委員稍有抑勒西路奇古等處居民稀少田地半屬荒蕪景廉請仿照成案由甘肅各州縣遷移民人一千戶分居奇古等處以實邊地此項遷移戶民由官發給盤費車腳牛具籽種趕於明春到古俾得盡力耕作以贍軍糧著左宗棠體察情形酌籌妥辦將此諭知戶部理藩院並由五百里諭令左宗棠景廉金順袁保恆知之○以廣壽爲兵部尙書魁齡爲左都御史調恩承爲吏部左侍郎以紹祺爲刑部左侍郎

由內閣學士遷

○王文韶奏湖南漕糧驟難改徵本色請

採買米二萬石運津允之○辛亥予太醫院左院判李德立以三四品京堂候補右院判莊守和以四五品京堂候補○壬子諭軍機大臣等沈葆楨等奏日本遵約退兵收回草房營地方一摺日本兵船盡數退出臺灣其遺下營房草房板片均經點收完竣該處已派官軍填紮惟琅璫一帶善後機宜亟須悉心籌畫妥善經營所有招撫生番及修城開路各事宜仍當妥籌辦理毋得以倭兵已退卽形鬆懈著沈葆楨文煜李鶴年王凱泰潘蔚懌遵十月二十八日諭旨妥爲布置毋稍因循沈葆楨等惟當於此時力圖自強之策以期未雨綢繆庶幾有備無患另片奏道員黎兆棠因病回籍等語該員見經簡放津海關道卽著沈葆楨傳知黎兆棠病痊後迅速赴任以重職守○癸丑冬至祀天於圓丘遣醇親王恭代行禮○諭軍機大臣等前因丁寶楨奏石莊戶決口奪

潘南趨亟應堵築請飭撥款一摺當諭令該部速議具奏茲據戶部工部會議奏稱石莊戶決口關係東南兩省大局自應趕籌修築所需工款除上年存銀二十八萬兩外擬撥各省地丁等銀七十萬兩以資應用等語見在經費支絀該部以有上年存款可以動用合之此次撥款幾及百萬當可興工舉辦惟據該撫所奏決口情形亟宜及時趕辦設因款項不繼致有停待貽誤非輕著戶部仍照該撫原請一百五十萬兩之數卽行指撥有著之款趕緊撥解毋誤要需並著丁寶楨卽將應築隄壩及挑挖引河各工勘明地勢迅速妥辦毋再坐失事機仍督飭承辦各員實心經理剔除積弊務使款歸實用不准稍有虛糜喬松年亦當和衷商酌通籌辦理以裨大局將此諭知戶部並由五百里諭令喬松年丁寶楨知之○諭左宗棠奏籌畫移設糧臺辦理採糧轉運事宜暨請

開除屯田經費各摺片肅州設立西征糧臺既據左宗棠奏稱南北相距甚遙辦理均形窒礙刻下北路轉運不患無駝採辦亦易自無庸膠柱鼓瑟惟見在烏科兩城實存糧石究有若干每年所產糧石若干畱備各該城兵食若干以及轉運駝隻能否購辦足敷應用著額勒和布杜嘎爾多布沁扎木楚托倫布保英詳細確查迅速具奏糧臺之設必與軍行道路相宜左宗棠所奏於烏里雅蘇台科布多巴里坤地方擇一要處移臺駐紮並著兩處設立分臺之處卽著與袁保恆妥商辦理袁保恆與左宗棠同辦一事務當和衷商榷毋得各存意見致誤事機景廉金順統領大軍西進總期糧食源源接濟俾利師行並著隨時與左宗棠袁保恆妥切函商以重軍食屯政雖與行軍相宜惟今昔情形不同目前尙難舉辦著與袁保恆悉心商酌總期事有實濟餉不虛糜餘著照

左宗棠所擬辦理左宗棠原摺片著鈔給袁保恆景廉等閱看將此由六百里各諭令知之○甲寅諭內閣朕於本月遇有天花之喜仰蒙 慈安端裕康慶皇太后 慈禧端佑康頤皇太后調護朕躬無微不至並荷 慈懷曲體俯允將內外各衙門章奏 代爲披覽裁定朕心實深欣感允宜崇上兩宮 皇太后徽號以冀仰答 鴻慈於萬一所有一切應行典禮著該衙門敬謹辦理○諭朕奉 慈安端裕康慶皇太后 慈禧端佑康頤皇太后懿旨慧妃著封爲皇貴妃瑜嬪著封爲瑜妃珣嬪著封爲珣妃貴人西林覺羅氏著封爲璿嬪○諭朕奉 慈安端裕康慶皇太后 慈禧端佑康頤皇太后懿旨皇帝於本月遇有天花之喜仰賴 蒼穹默佑諸臻康吉中外同歡允宜普沛恩綸優加賞賚內廷行走惇親王奕誼著賞食親王雙俸恭親王奕訢前經賞食親王雙俸

著再加賞親王俸一分醇親王奕誥著賞食親王雙俸孚郡王奕
諲惠郡王奕詳均著賞食親王俸郡王銜貝勒載治載澂均著賞
食郡王俸貝子銜奉恩鎮國公奕謨著賞食貝子俸御前大臣科
爾沁博多勒噶台親王伯彥訥謨祜著賞食蒙古親王雙俸郡王
銜貝勒奕劻著賞食郡王俸固倫額駙公景壽著賞食貝子俸御
前行走貝勒載漪貝勒載澂均賞食郡王俸御前行走奉恩輔國
公載瀛著賞食奉恩鎮國公俸頭品頂帶貼黃著賞食輔國公俸
御前行走貝勒那爾蘇著賞食蒙古郡王俸軍機大臣大學士文
祥寶鋆沈桂芬李鴻藻均著賞戴雙眼花翎總管內務府大臣尙
書英桂崇綸左都御史魁齡均著賞戴雙眼花翎侍郎榮祿著賞
加太子少保銜並賞戴雙眼花翎太子少保銜侍郎明善著賞太
子太保銜並賞戴雙眼花翎貴賓文錫均著賞戴雙眼花翎弘德

殿行走尙書廣壽侍郎徐桐候補內閣學士翁同龢均著賞戴花翎翰林院侍講王慶祺著賞加二品頂帶南書房行走侍郎黃鉅著賞戴花翎候補三品京堂潘祖蔭著以侍郎候補翰林侍講學士孫貽經詹事府左庶子徐郁翰林院侍講張家驥詹事府左贊善歐陽保極均著以應升之缺儘先升用所有王公及京外大小官員均著賞加二級京師八旗又綠步各營兵丁均著賞給半月錢糧用示行慶推恩至意○諭朕奉 慈禧端裕康慶皇太后慈禧端佑康頤皇太后懿旨皇帝於本月遇有天花之喜仰賴蒼穹默佑諸臻康吉寅感實深因念欽恤庶獄仁政所先允宜特沛恩施量加矜恤所有刑部及各省已經結案監禁人犯除情罪重大及常赦所不原者毋庸查辦外其餘著軍機大臣會同刑部酌量案情輕重分別請旨減等發落其軍流徒杖以下人犯一併

分晰減等完結俾霑寬大之恩勉圖自新之路用示子惠兆民法
外施仁至意○予故右春坊右中允馮桂芬建祠○乙卯諭內閣
朕奉 慈安端裕康慶皇太后 慈禧端佑康頤皇太后懿旨彤
妃等位侍奉 宣宗成皇帝多歷年所允宜加崇位號以表尊榮
彤妃晉封爲彤貴妃 佳妃晉封爲佳貴妃 成妃晉封爲成貴
妃 貴人蔡佳氏晉封爲恆嬪 貴人尙佳氏晉封爲豫嬪○諭
朕奉 慈安端裕康慶皇太后 慈禧端佑康頤皇太后懿旨麗
皇貴妃等位侍奉 文宗顯皇帝均稱淑慎麗皇貴妃著封爲皇
貴太妃婉妃著封爲婉貴妃祺妃著封爲祺貴妃玫妃著封爲玫
貴妃璈嬪著封爲璈妃吉嬪著封爲吉妃禧嬪著封爲禧妃慶嬪
著封爲慶妃○諭禁宗室寄居外城○諭錢鼎銘添撥東河防險
銀二十六萬兩○丙辰諭內閣兵部遵議提督失察在逃逆犯處

分一摺湖南提督馬如龍於逆犯張兆綬改名張瑞臣潛隨來京
未能覺察實屬咎無可辭馬如龍著照部議革職畱任○命丁寶
楨籌撥銀六萬兩備運河工需○己未諭軍機大臣等文麟等奏
飭派纏頭接護伯錫爾福晉回哈一摺伯錫爾福晉上年被逆匪
擄至七克騰木經安集延南路夷目帕夏搶出安置布古爾地方
該福晉轉徙流離殊堪矜念帕夏投遞文檔據稱俟奉到哈密大
臣印諭卽將該福晉送回其爲去逆效順已可概見文麟等見令
回王邁哈默特選派頭目前往該處卽著將伯錫爾福晉安速接
護回哈毋令失所該帕夏果能率領南路各城夷人翻然來歸再
將吐魯番城池獻出朝廷自必加以恩典著文麟等開誠曉諭設
法招徠以裨大局該大臣等接到帕夏回文卽著迅速具奏將此
由五百里各諭令知之○允戶部奏豫撥各省應解來年京餉暨

內務府經費○癸亥以沈秉成爲河南按察使

由江蘇蘇松太道遷

○甲子

諭軍機大臣等前因石莊戶決口亟須堵築當經諭令丁寶楨及時趕辦並諭戶部照該撫原請之數指撥有著款項以資工需茲據丁寶楨奏查勘石莊戶決口見難施工擬在迤下之賈莊建壩堵合卽於南北岸普築長堤惟查濮州爲北岸之上游而濮州之上游又在開州請飭直隸一律趕辦等語此項工程關係數省地方自當不分畛域通力合作趕籌辦理卽著丁寶楨籌備料物督飭在事各員及早興工以冀剋期蒞事其直隸境內應行堵築之處著李鴻章督飭該地方官妥速籌辦俾南北兩岸悉臻完固至應需工款據丁寶楨奏除部撥一百五十萬兩外尙不敷銀一百二三十萬兩著於山東藩運兩司及糧道各庫臨清東海兩關隨時通融那用以濟要需該撫務當嚴飭在事人員認真辦理儻有

浮冒因循致誤要工者卽行從嚴參辦如能辦理迅速工程完固准由丁寶楨奏請獎敘原摺著鈔給李鴻章閱看將此由四百里各諭令知之○丙寅以翁同龢爲內閣學士候補內閣學士○以雪澤愆期命恭親王詣大高殿恭代祈禱○是月蜀緩江蘇泰州等三十六州廳縣淮安等四衛被水被旱新舊額賦山東濮州等七十七州縣德州等四衛並東平所永阜所被水被旱被風被雹新舊額賦租課湖南澧州等九州縣暨岳州衛被水被旱新舊額賦緩徵安徽泗州等五十四州縣被水被旱被風被蟲新舊額賦租課十二月辛未諭內閣岑毓英奏遵查通省荒熟田地酌擬應徵應減錢糧成數一摺據稱上年錢糧仍係儘收儘解開支軍餉本年委員分投丈量按畝估計成數已種田畝自九成至五六成不等荒蕪田畝自一成至四五成不等請分別徵收減免等語雲南甫

就肅清流亡未集田畝半屬荒蕪若將應徵錢糧照常徵收民力
實有未逮加恩著照所請卽自同治十三年起予限十年將滇省
各屬錢糧按照此次清查已種田畝成數分別徵收其荒蕪田地
各按成數將應納錢糧暫行蠲免以蘇民困俟十年限滿百姓元
氣稍復荒蕪盡行開墾再照舊額徵收該督撫卽刊刻謄黃徧行
曉諭務使實惠均霑毋任吏胥舞弊用副朕軫念民艱至意○吏
部以大學士寶鋆應定何殿閣請得旨李鴻章著授爲文華殿大
學士文祥著授爲武英殿大學士寶鋆著授爲體仁閣大學士○
壬申以循聲卓著予故廣東鹽運使鍾謙鈞交國史館立傳○癸
酉予故四川彭山縣知縣升任道員蹇闇建祠○甲戌 上疾增
劇○允李宗義奏來年江北漕米改辦海運○李宗義以病免以
劉坤一署兩江總督劉秉璋署江西巡撫

由布政使署

○上疾大漸

酉刻崩於養心殿東暖閣○ 慈安端裕康慶皇太后 慈禧端佑康頤皇太后御養心殿西暖閣召惇親王奕訢恭親王奕訢醇親王奕譞孚郡王奕譔惠郡王奕詳貝勒載治載澂公奕謨御前大臣伯彥訥謨祜奕劻景壽軍機大臣寶鋆沈桂芬李鴻藻總管內務府大臣英桂崇綸魁齡榮祿明善貴寶文錫弘德殿行走徐桐翁同龢王慶祺南書房行走黃鈺潘祖蔭孫貽經徐郁張家驥入欽奉 懿旨醇親王奕譞之子 貼黃 著承繼 文宗顯皇帝爲子入承大統爲嗣皇帝○奉遺詔曰朕蒙 皇考文宗顯皇帝覆載隆恩付畀神器沖齡踐阼寅紹丕基臨御以來仰蒙兩宮 皇太后垂簾聽政宵旰憂勞嗣奉 懿旨命朕親裁大政仰維 列聖家法一以敬 天法 祖勤政愛民爲本自維薄德敢不朝乾夕惕惟日孜孜十餘年來稟承 懿訓勤求上理雖幸官軍所至

粵捻各逆次第削平滇黔關隴苗匪回匪分別剿撫俱臻安靖而
兵燹之餘吾民瘡痍未復每一念及寤寐難安各直省遇有水旱
偏災凡疆臣請蠲請賑無不立沛恩施深宮兢惕之懷當爲中外
臣民所共見朕體氣素強本年十一月適出天花加意調攝乃邇
日以來元氣日虧以致彌留不起豈非天乎顧念統緒至重亟宜
傳付得人茲欽奉兩宮 皇太后懿旨醇親王之子 貼黃著承繼

文宗顯皇帝爲子入承大統爲嗣皇帝特諭嗣皇帝仁孝聰明
必能欽承付託 天生民而立之君使司牧之惟日矢憂勤惕勵
於以知人安民永保我不丕基並孝養兩宮 皇太后仰慰 慈
懷兼願中外文武臣僚共矢公忠各勤厥職用輔嗣皇帝丕隆之
治則朕懷藉慰矣喪服仍依舊制二十七日而除布告天下咸使
聞知○乙亥未刻大殮畢奉安 梓宮於乾清宮○庚寅奉移

梓宮觀德殿○光緒元年二月戊子寅刻 皇后阿魯特氏崩○

庚寅定 萬年福地於 雙山峪修建 山陵○甲午奉移 大

行皇后梓宮於永思殿○三月己亥恭上 大行皇帝尊諡曰

繼天開運受中居正保大定功聖智誠孝信敏恭寬毅皇帝 廟

號 穆宗○五月戊申恭上 大行皇后尊諡曰 孝哲嘉順淑

慎賢明憲天彰聖毅皇后○九月辛亥奉移 穆宗毅皇帝梓宮

暨 孝哲毅皇后梓宮暫安隆福寺行宮派王大臣輪班敬謹守

護○五年三月庚午卯刻葬 惠陵 上在位十三年 聖壽十

有九 上誕膺 寶命臨御萬邦荷 昊穹眷佑之隆嗣 列聖

貽謀之遠 冲齡踐阼蒙兩宮 皇太后垂簾聽政時四方多事

上祇承 慈誨 垂拱無爲 天與人歸捷書疊報迨 親政

後宵衣旰食綱舉目張庶事用康八方底定懿敷盛哉洵 天生

敦敏御齊之主上符元會下濟烝民用是海宇蕩平中外僭服邇
安遠至萬國輸誠駿烈鴻猷爲千古罕觀之隆軌也而乃天花
甫謝聖體違和遽棄臣民莫攀龍馭衝謠壤擊之倫棧嶂航
瀛之侶莫不痛失怙恃奔走號呼於此見人心之感戴者深而
深仁厚澤之淪浹肌髓者非一日也金匱石室式煥宏謨方策畱
貽永永無極則上之所以壽萬世壽萬民與壽其身曷以異哉